

雲南叢書

趙藩題

大錯和尚傳

趙聯元纂

263107

大錯和尚故明右簽都御史巡撫雲南丹徒錢邦芭也
邦芭字開少隆武朝以選貢中書上書召對授監察御
史劾陳謙持兩端上置謙於法尋遣邦芭巡按四川兼
提學邦芭甫行而閩畱陷隆武及於難永厯立於肇慶
邦芭於時聯絡川中諸將戰守數有功疏報全川略定
文武升擢有差邦芭晉右簽都御史先是湖廣巡撫堵
胤錫之招安李錦高一功也請封疏久持不下邦芭疏
言方今國家新造兵勢單弱高李諸賊擁三十萬眾於
楚中若不以高爵招之彼必不肯爲我用全楚非我有

也今出空爵於朝廷之上一日而得三十萬之兵免楚
生靈之塗炭孰得孰失卽昔漢高王韓信於齊豈得已
哉今當權宜假以封號詔從之楚宗人朱容藩者授總
督川東兵馬由楚入川沿途招搖賊私狼籍邦芑廉得
之具疏言狀上削容藩職而容藩得敗兵歸之自稱監
國副元帥自忠州進駐重慶煽諸將相攻邦芑方率王
祥復遵義再疏劾之曰容藩昔得罪朝廷幸蒙寬宥命
使湖南乃假朝廷威靈籠絡諸將潛懷不軌僞造印信
選授文武今歲六月臣巡川南見容藩所刊建置百官
榜文其自稱曰予一人予小子如是而欲其終守臣節

其可得乎今寇賊充斥干戈不息道途荒阻兩川僻處
西徼與行朝隔絕蠻夷土司易動難撫且三年之間四
易年號人情皇惑莫知適從臣不憚艱苦往來深山大
箐荒城敗壘中毆除豺虎剪刈荆棘招集殘黎宣布威
德西川之地始知正朔所在今聲教漸著法紀方行而
容藩包藏禍心窺伺神器陽尊朝廷陰行僭僞倘羽翼
得成便有公孫子陽王建孟知祥之事臣竊憤悶已移
書告以大義傳檄楚督何騰蛟堵胤錫川督楊喬然李
乾德及各大鎮共誅叛逆毋或玩寇邦芑復封疏稿達
胤錫胤錫得疏卽率兵入川見容藩切責之川東文武

始知容藩名號之僞或解散或請討以自贖容藩逃踞
萬縣天字城戰敗死當是時清兵入川張獻忠敗死於
川北其下孫可望李定國等走黔陷遵義長驅入滇乘
沙定洲之亂而據之邦芑與王祥等復遵義朝命邦芑
兼撫黔總兵侯天錫議招安可望邦芑避之乃脩書差
推官王顯往招可望大喜使顯復邦芑請具疏邀王封
邦芑疏請封以公爵而可望亦自遣龔彝隨楊畏知赴
軍慶求封廷議封以平遠王而廣西總兵陳邦傳矯詔
封以秦王可望遂稱秦王擁眾復入黔王祥敗死總督
范鎮歸降可望迫授邦芑官邦芑不受退隱餘慶之蒲

村開柳湖於他山之下結屋居之歷兩年餘可望逼召
十有三次堅拒不爲動甲午二月二十三日爲邦芭生
辰知交門人介觴於蒲村次日而餘慶令鄒秉浩將可
望命趣就道邦芭飲之酒卽日祝髮改所居曰小年庵
門下於三日內祝髮者先後十有一人曰古心古雪古
愚古德古義古拙古荒古懷古圉古處邦芭併改柳湖
之居曰大錯庵與諸弟子分處焚脩焉而可望卒忌邦
芭使任譔爲書婉勸仍堅拒遂遣人械至貴陽拘於大
興寺時永歷駐蹕安隆可望待之無人臣禮殺從臣吳
貞毓等十八人方日夜謀篡逼會李定國入衛移蹕入

滇可望謀犯關甚亟程源鄭逢元雖被脅於可望然尙
不忘故國數過邦芭秘議邦芭謂馬寶馬進忠馬維興
三人皆勳舊曾與我言而憤慨欲圖報朝廷而無路也
至可望標下惟白文選心在朝廷昔曾與我訂盟誓不
相負者可望犯滇必用諸人爲將從中用計圖可望如
反掌耳身被幽禁惟二君致意而圖之源逢元商文選
等俱如約可望兵入滇李定國禦之大戰於交水白文
選馬寶等倒戈可望大敗走湖南降清邦芭得脫身赴
行在仍授左都御史掌院事兼巡撫雲南先是有方于
宣者爲可望僞翰林詔事之勸進甚力時爲提學試阮

靖其命題有擬賀秦王出師討逆大捷表及聞可望敗
則馳書於邦芭云欲糾義旅擒可望以獻邦芭答以詩
云脩史當年筆削餘帝星并度竟成虛秦宮火後收圖
籍猶見君家勸進書蓋于宣曾爲可望脩史又嘗對人
言帝星明於并度秦王當有天下故也於時督理李定
國軍事者爲金維新秩左都在邦芭上維新又與馬吉
翔昵朝政多舛邦芭言不用鬱鬱浮沈而已清兵三路
入滇會城不守永厯西狩入緬從臣多半道相失邦芭
至騰越仍僧服隱居雞足山撰山志成十卷已而聞緬
變永厯帝崩於昆明乃痛哭出山行脚至湖南衡嶽居

十餘年相傳委蛻於此邦芑所著書有蕉書記殘明事
入禁燬書曰今不傳所著詩文雜見於他書者余哀而
輯之曰大錯和尚遺集四卷其所爲梅柳詩百詠久已
單行邦芑有從弟曰邦駿字馭少亦能詩廣陽襍記載
其居庸關七律二首曰邦楨字啟少諸生亦從軍不知
其下落從子曰默字昭音崇禎癸未進士亦爲僧名成
回示寂越之顯慶寺朱彝尊采其詩入明詩綜曰點字
鑒濤官監紀終老蒲村有詩曰最庵集沅湘耆舊集云
曾占武陵籍猶蒲村前事蓋亂離奔走萍蓬莫定尤可
慨也黔詩紀略載其詩三十八首并抄附大錯集後

與點皆注籍嘉善殆與丹徒兩地析居與

拙庵居士曰開少先生豈其以託迹方外爲畢乃事哉
挾卓越之才抱忠讜之略委質於末運措挂殘山廣水
間地棘天荆千磨百折進不咫尺顛輒尋丈卒不能挽
鄧林之落日初以爲僧抗劇賊者終以爲僧徇君父蓋
自金蟬慘變而眞不能不以圓頂方袍爲畢生歸宿其
節可壯而其志尤可悲矣余爲童子時見先生贈先戶
鄒公寶岩居詩居易軒集序又於外王父家見先生作
石寶山圖記長卷文章書法皆其清剛忠亮之氣噴薄
而出高山仰止數十年往來於懷今輯先生遺集過考

行事之見於故書野乘者草先生傳弁之集端爲讀者
知人論世之助且藉以補南疆逸史之闕云

大錯和尚遺集卷一

雲南叢書二編集部之四

明丹徒錢邦芑開少稿

清劍川趙聯元拙庵輯

詩

蒲村歸田二首

平生寔世情賦性耽閒逸
塵網一羈絆舉步成隘窒
沈思本無味忽忽如有失
一朝決去就曠然深自得
理我荷葉衣拂我笋皮笠
逍遙田畝間昂首看雲色
百物適自然欣彼歸飛翼

春至雨露滋百草俱萌茁
荷鋤周田塍土膏解枯澀
汨

汨水泉動蠕蠕蚘蚘出呼僅治犁鋤催耕不遑息天時
一相違事倍功猶嗇君子旣勞心小人應食力俯仰天
地間貴賤咸有職一人肆遊惰羣情能無惻飽暖不知
恥恐有災患及自非終歲勤豐稔安可必

喜李少白自楚歸里二首

三楚遊踪一劍輕山川無恙慰君行春風故國人千里
夜雨孤帆夢幾程湘漢波連殘月影洞庭雲擁斷潮聲
歸來長物都刪盡檢點詩囊白雪清

歷盡崎嶇千萬山蕭蕭楓葉點衣斑天涯日暮鴈初落
故國秋深人未還十載風塵悲短髮半生事業老朱顏

相看世故都難合擾擾塵勞未可刪

甲午祝髮偈

一杖橫擔日月行山奔海立問前程任他霹靂眉邊過
談笑依然不轉睛

答任譔貽書

破衲蒲團伴此身相逢誰不訛孤臣也知官爵多榮顯
只恐田橫客笑人

被械至黔途中口占三首

纔說求生便害仁一聲長嘯出紅塵精忠大節千秋在
桎梏原來是幻身

杻械縈纏是夙因千磨百折爲天倫
虛空四大終須壞
忠孝原來是法身

前劫曾爲忍辱仙百般磨鍊是奇緣
紅爐火裏點春雪
弱水洋中泛鐵船

答方于宣貽書

脩史當年筆削餘帝星井度竟成虛
秦宮火後收圖籍
猶見君家勸進書

賦得山靜似太古柬趙雲升戶部三首

山深人不到流水對高松
竹徑花難掃柴門雲自封
鄰
雞遲午報野碓罷朝春
雨過新苔遍惟餘麋鹿蹤

春深花正紅
况在萬山中
歲月應難誌
耕耘自可風
泉流隨去住
樹影任西東
溪上垂綸者
行藏未易通
心閑耳目靜
萬籟不聞喧
松下棋聲落
窗前花影翻
清泉灌芳圃
獨鶴步高軒
鄰叟多淳朴
相看無一言

採茶

隊隊攜筐去
朝朝采葉歸
綠沾嵐影重
青帶露痕稀
柔嫩疑傷指
芬芳欲療飢
及時供茗具
幽事慮多違

試新茶

消渴廢詩箋
新芽手自煎
流泉春雨後
活火午風前
香繞歌餘夢
涼侵醉裏禪
落花如有意
輕颺竹爐煙

題永北阮氏世孝錄

己亥之秋余偶過瀾滄看兵臺未孩曹公寓瑞
光寺值門弟子張爾介亦遊於此因與其友阮
儀先偕來出此冊屬余爲題阮宜人卽儀先之
祖母也余自乙酉阻滇黔之間莫能歸不奉慈
闈色笑者十五年矣對此自傷於中因併及馬
阮家世孝流慶長碑傳人口名姓香母爲翁疾懷感傷
藥餌不瘳中旁徨金刀割股調藥嘗一匙入口心清涼
病翁霍然起筐牀孝道成家感正祥十歲女子知能良
母病朝暮相扶將憂心如焚幾斷腸雪刃隱隱衣中藏